

Na osnovu čl. 10. i 12. Zakona o udruženjima i fondacijama Bosne i Hercegovine (Sl. Gl. BiH, br. 32/01 i 42/03, 63/08 i 76/11) i čl. 22. Zakona o sportu Bosne i Hercegovine (Sl. Gl. 27/08 i 102/09), čl. 20 Statuta Streljačkog saveza Bosne i Hercegovine, Skupština Streljačkog saveza Bosne i Hercegovine 27.03.2016. u Tuzli, donijela je prečišćen tekst Statuta:

STATUT

STRELJAČKOG SAVEZA BOSNE I HERCEGOVINE

I. OPĆE ODREDBE

Član 1.

Streljački savez Bosne i Hercegovine, (u daljnjem tekstu: Savez) osnovan je Odlukom o osnivanju, broj: 01/13 od 22.12.2013. godine, na osnovu Odluke Skupštine Streljačkog Saveza Federacije Bosne i Hercegovine, broj: 04/13 od 30.07.2013. godine i Odluke Skupštine Streljačkog saveza Republike Srpske, broj: 26/13/AA od 21.02.2013. godine, u skladu sa Zakonom o udruženjima i fondacijama Bosne i Hercegovine (u daljem tekstu: Zakon) i članom 22. stav 3. Zakona o sportu u Bosni i Hercegovini.

Član 2.

Ovim Statutom, u skladu sa članom 12. Zakona, utvrđuje se:

- a) naziv, skraćeni naziv i sjedište Saveza;
- b) ciljevi i djelatnosti Saveza;
- c) postupak za prijem i isključivanje članova;
- d) organi Saveza, način na koji se biraju, ovlaštenja koja imaju, kvorum i pravila glasanja, trajanje mandata, ovlaštenja za sazivanje Skupštine Saveza, uvjete i način raspuštanja, odnosno prestanak rada Saveza;
- e) pravila za ostvarivanje, upotrebu i raspolaganje sredstvima Saveza, kao i organ koji je ovlašten za nadzor nad upotrebom tih sredstava;
- f) javnost rada;
- g) način podnošenja finansijskog izvještaja i izvještaja o radu;

- h) postupak za izmjenu i dopunu statuta, ovlaštenje i način donošenja drugih općih akata;
- i) opis oblika i sadržaj pečata i znaka Saveza;
- j) zastupanje Saveza u pravnom prometu;
- k) uslovi i postupak za spajanje i podjelu Saveza, odnosno prestanak rada Saveza, uključujući i poseban kvorum ili pravila za postizanje kvalificirane većine u postupku glasanja;
- l) postupak za raspolaganje preostalom imovinom ili drugim sredstvima u slučaju raspuštanja ili prestanka rada Saveza;
- m) druga pitanja od značaja za organizovanje rada Saveza.

Član 3.

Savez je sportska, nevladina, nestranačka i nepolitična organizacija, osnovana u cilju unapređenja i razvoja streljačkog sporta u Bosni i Hercegovini, u skladu sa Zakonom o udruženjima i fondacijama Bosne i Hercegovine, Zakonom o sportu u Bosni i Hercegovini i ovim Statutom.

Savez ima pravo i slobodu da se udružuje i saraduje sa Međunarodnom streljačkom sportskom federacijom (ISSF) i Evropskom streljačkom konfederacijom (ESC).

Savez je član Olimpijskog komiteta Bosne i Hercegovine.

Savez djeluje na cijelom području Bosne i Hercegovine.

Član 4.

Savez stiče status pravnog lica danom upisa u Registar udruženja koji se vodi kod Ministarstva pravde Bosne i Hercegovine.

Savez u pravnom prometu nastupa samostalno u svoje ime i svoj račun. Za obaveze preuzete u pravnom prometu, Savez odgovara svojom cjelokupnom imovinom.

II. OSNOVNI PRINCIPI

Član 5.

Osnovni principi rada Saveza su:

- zakonitost;

- dobrovoljnost;
- otvorenost;
- transparentnost.

III. NAZIV, SKRAĆENI NAZIV I SJEDIŠTE SAVEZA

Član 6.

Puni naziv Saveza glasi:

STRELJAČKI SAVEZ BOSNE I HERCEGOVINE
STRELJAČKI SAVEZ BOSNE I HERCEGOVINE
СТРЕЉАЧКИ САВЕЗ БОСНЕ И ХЕРЦЕГОВИНЕ

Skraćeni naziv Saveza glasi:

SSBiH

SSBiH

ССБиХ

Naziv Saveza na engleskom jeziku glasi:

SHOOTING FEDERATION OF BOSNIA AND HERZEGOVINA

Član 7.

Sjedište Saveza je u Sarajevu, ulica Paromlinska broj 17.

IV. PEČAT I ZNAK SAVEZA

Član 8.

Savez ima pečat okruglog oblika, prečnika 30 mm, u kojem je ispisan tekst punog naziva Saveza na latiničnom i ćiriličnom pismu: STRELJAČKI SAVEZ BOSNE I HERCEGOVINE, СТРЕЉАЧКИ САВЕЗ БОСНЕ И ХЕРЦЕГОВИНЕ, sjedište: Sarajevo, Сарајево, a u sredini pečata je znak Saveza.

Savez ima svoj znak. Znak Saveza je okruglog oblika koji predstavlja stilizovanu metu od tri četvrtine kruga crne boje u čijem se gornjem desnom dijelu nalazi grb Bosne i Hercegovine.

V. CILJEVI I DJELATNOST SAVEZA

Član 9.

Ciljevi i djelatnost Saveza su:

- organiziranje i sprovođenje sistema takmičenja;
- zastupanje i predstavljanje sporta u međunarodnim sportskim organizacijama;
- pripremanje i nastupanje državnih reprezentacija na zvaničnim međunarodnim takmičenjima;
- utvrđivanje programa razvoja u skladu sa Strategijom;
- saradnja sa nadležnim sportskim i drugim organima Bosne i Hercegovine;
- izdavanje publikacija u svrhu ostvarivanja djelatnosti Saveza, u skladu sa Zakonom.

Savez može za djelatnosti koje nisu neposredno povezane sa djelatnostima Saveza iz člana 9. ovog Statuta osnovati posebno pravno lice, u skladu sa članom 4. Zakona o udruženjima i fondacijam Bosne i Hercegovine.

VI. ČLANSTVO U SAVEZU

Član 10.

Osnivači Saveza su ujedno i članovi Skupštine koji svojstvo člana Saveza stiču danom upisa u Registar udruženja.

Svojstvo člana Saveza mogu steći sva pravna lica-savezi koji su registrovani kod nadležnih organa, a koji se bave streljačkim sportom, u programu ISSF-a.

Članstvo u Savezu je dobrovoljno.

Članovi Saveza mogu biti:

- a) Stalni članovi

- b) Pridruženi
- c) Počasni članovi

Redovni članovi Saveza su lica iz stava 1. ovog člana.

Odluku o prijemu novih članova donosi Skupština Saveza.

Redovni članovi potpisuju izjavu o prihvatanju Statuta i ciljeva i djelatnosti Saveza.

Pridruženi članovi pristupaju Savezu radi sudjelovanja u realizaciji ciljeva i djelatnosti Saveza.

Počasni članovi su lica koja materijalno ili na drugi način pomažu rad Saveza bez prava glasa.

Počasni članovi mogu učestvovati u radu Saveza savjetodavnom funkcijom.

Naziv počasnog člana Saveza dodjeljuje Skupština na prijedlog Upravnog odbora.

Član 11.

Savez vodi spisak svojih članova.

Član 12.

Članovi Saveza imaju prava da:

- a) Imenuje svoje predstavnike u Skupštinu Saveza za mandatni period Skupštine;
- b) preko svojih predstavnika aktivno učestvuju u radu i odlučivanju u svim organima i radnim tijelima Saveza;
- c) njihovi predstavnici biraju i budu birani u organe i radna tijela Saveza;
- d) aktivno učestvuju u utvrđivanju programa i plana rada Saveza i njihovoj realizaciji;
- e) ostvaruju uvid u rad Saveza, pokreću akcije, predlažu i preduzimaju mjere za ostvarivanje ciljeva i djelatnosti i programa rada Saveza;
- f) ostvaruju zaštitu svojih prava.

Članovi saveza su obavezni da:

- a) poštuju odredbe Statuta, ciljeve i djelatnosti i druga opšta akta Saveza;
- b) međusobno sarađuju radi ostvarivanja ciljeva i djelatnosti utvrđenih Statutom, drugim aktima Saveza i odlukama njegovih organa;
- c) aktivno učestvuju u obezbjeđenju realizacije usvojenih programa i planova Saveza i drugih obaveza od interesa za streljački sport;
- d) učestvuju u stručnim aktivnostima Saveza;
- e) da redovno i na vrijeme plaćaju članarinu.

Svaki član Saveza može pokrenuti postupak pred nadležnim sudom za utvrđivanje ništavosti općeg akta Saveza koji je donijet suprotno odredbama Statuta ili drugog općeg akta Saveza, a najkasnije u roku od šest mjeseci od dana donošenja tog akta.

Član 13.

Članstvo u Savezu prestaje:

- a) Na vlastiti zahtjev, potpisivanjem izjave o istupanju iz Saveza;
- b) Isključenjem člana, u slučaju djelovanja u suprotnosti sa ciljevima i djelatnostima, Statutom i aktima Saveza;
- c) Prestankom svojstva pravnog lica Saveza.

Član 14.

Svaki član Saveza može dobrovoljno istupiti iz Saveza na osnovu pismene izjave o istupanju koju dostavlja Upravnom odboru Saveza. O uslovima i načinu prestanka članstva odlučuje Skupština Saveza.

Član 15.

Član Saveza koji grubo krši Statut Saveza, ne izvršava svoje obaveze prema Savezu ili svojim postupcima nanosi štetu Savezu ili narušava njegov ugled, može biti isključen iz Saveza. Odluku o prestanku članstva u Savezu donosi Upravni odbor Saveza.

Član 16.

Član koji je nezadovoljan odlukom iz prethodnog člana, može uložiti prigovor Skupštini Saveza u roku od 15 dana od dana prijema obavijesti.

Odluka Skupštine po žalbi je konačna.

VII. ORGANI SAVEZA, NAČIN NA KOJI SE BIRAJU, OVLAŠTENJA KOJA IMAJU, KVORUM I PRAVILA GLASANJA, TRAJANJE MANDATA, LICE OVLAŠTENNO DA SAZOVE SKUPŠTINU, USLOVI I NAČIN RASPUŠTANJA, ODNOSNO PRESTANAK RADA

Član 17.

Organi Saveza su:

- a) Skupština
- b) Upravni odbor
- c) Nadzorni odbor
- d) Predsjednik Saveza
- e) Disciplinski sud

Član 18.

Skupština

Skupština Saveza (u daljem tekstu Skupština) je najviši organ Saveza.

Skupštinu čini 30 predstavnika i to: 15 predstavnika iz „STRELJAČKOG SAVEZA FEDERACIJE BOSNE I HERCEGOVINE“ i 15 predstavnika iz STRELJAČKOG SAVEZA REPUBLIKE SRPSKE.

Skupština može biti: osnivačka, redovna, vanredna i izborna.

Redovna Skupština se saziva najmanje jednom godišnje.

Vanredna Skupština se saziva iznimno, u slučaju vanrednih potreba.

Izborna Skupština se održava nakon isteka mandata, svake četvrte godine.

Član 19.

Skupština ima predsjednika i podpredsjednika Skupštine, koje bira i razrješava Skupština na period od četiri godine vodeći računa da svaki mandat bude iz drugog entitetskog Saveza.

Skupštinu saziva predsjednik Skupštine, najkasnije 15 dana prije njenog zasjedanja.

Predsjednik Skupštine je dužan sazvati vanrednu Skupštinu na zahtjev jednog od osnivača Saveza i kada to traže Upravni odbor ili Nadzorni odbor Saveza.

Ako predsjednik Skupštine ne sazove Skupštinu u roku od 15 dana u slučajevima iz prethodnog stava, odluku o sazivanju Skupštine donijet će Upravni odbor Saveza.

Član 20.

Skupština radi i odlučuje u skladu sa Statutom i poslovnikom o radu.

Kvorum Skupštine za rad je nadpolovična većina predstavnika Skupštine, odnosno 2/3 članstva ili dvadeset kada se odlučuje o:

- donošenje Statuta Saveza i njegovih izmjena i dopuna, i
- izboru organa Saveza.

Kvorum se utvrđuje u odnosu na spisak predstavnika iz člana 18 ovog Statuta.

Član 21.

Odluke Skupštine se donose javnim glasanjem, a samo izuzetno tajnim glasanjem.

Tajno glasanje se vrši na numerisanim i ovjerenim listićima pečatom Saveza.

Skupština radi i odlučuje u skladu sa Statutom i Poslovníkom o radu.

Skupština bira zapisničara na početku rada sjednice koji vodi zapisnik.

Zapisnik mora da odražava bitan tok rada i suštinu svih odluka i stavova Skupštine.

Član 22.

Odluke o spajanju, podjeli ili prestanku rada Saveza, Skupština donosi dvotrećinskom (2/3) većinom glasova svih predstavnika u Skupštine.

Član 23.

Predsjednik Skupštine:

- a) stara se o organizovanju Skupštine i saziva njene sjednice;
- b) predlaže dnevni red sjednice;
- c) predsjedava sjednicama Skupštine;
- d) potpisuje akte donesene na Skupštini;
- e) stara se o izvršavanju odluka, zaključaka i drugih akata Skupštine;
- f) koordinira rad organa i tijela Skupštine;
- g) vrši i druge poslove koje mu odredi Skupština u skladu sa zakonima i ovim Statutom.

U slučaju odsutnosti predsjednika Skupštine Saveza, sve poslove iz prethodnog stava obavljat će podpredsjednik Skupštine Saveza.

Član 24.

Skupština, kao najviše tijelo udruženja je nadležna za:

- a) donošenje statuta, izmjena i dopuna statuta i drugih akata određenih statutom;
- b) odlučivanje o pripajanju, razdvajanju, transformisanju, raspuštanju i prestanku rada, kao i o drugim statusnim promjenama udruženja;
- c) imenovanje i razrješenje članova upravnog odbora;
- d) usvajanje izvještaja koje je pripremio upravni odbor; i
- e) donosi program rada Saveza i osnovne smjernice razvoja streljačkog sporta u BiH;
- f) donosi godišnje i srednjoročne planove Saveza;
- g) bira i razrješava predsjednika i podpredsjednika Skupštine, članove Upravnog odbora, Nadzornog odbora i Disciplinskog suda;

- h) donosi odluke o promjeni naziva, sjedišta i znaka Saveza;
- i) donosi odluke o sistemu takmičenja na nivou Bosne i Hercegovine i nižim nivoima;
- j) donosi odluke o prijemu novih članova u Savez;
- k) odlučuje o visini plaćanja kotizacija i članarine;
- l) donosi poslovnik o radu Skupštine;
- m) odlučuje o svim drugim pitanjima koja nisu u nadležnosti drugih tijela Saveza.

Član 25.

Predsjednik i podpredsjednik Skupštine moraju biti iz različitih entitetskih saveza.

Prilikom svakog narednog izbora viši se rotacija.

Pri izboru predsjednika i podpredsjednika Skupštine, Saveza i Upravnog odbora treba voditi računa da oni budu iz različitih entitetskih Saveza, a da se po isteku mandata vrši rotacija po entitetskoj osnovi. Po istom principu se vrši izbor i rotacija predsjednika i broja članova ostalih organa i komisija u okviru Saveza.

Član 26.

Upravni odbor

Upravni odbor je izvršni organ Skupštine.

Upravni odbor ima predsjednika, potpredsjednika i sedam članova.

Entitetski Savez iz kojeg je predsjednik ima pet članova Upravnog odbora, a drugi Savez četiri člana Upravnog odbora.

Članove Upravnog odbora bira i razrješava Skupština Saveza.

Mandat članova Upravnog odbora traje četiri godine sa mogućnošću reizbora.

Upravni odbor se sastaje najmanje dva puta godišnje, a po potrebi i češće.

Dnevni red predlaže predsjednik Upravnog odbora.

Kvorum za održavanje sjednice Upravnog odbora je nadpolovična većina članova. prisustvo najmanje polovine članova odbora iz svakog entitetskog Saveza.

Upravni odbor donosi odluke dvotrećinskom većinom prisutnih članova.

Predsjednik Upravnog odbora saziva sjednice Upravnog odbora i istim predsjedava.

U slučaju njegove spriječenosti zamjenjuje ga podpredsjednik.

Pored članova Upravnog odbora, sjednicama mogu prisustvovati i druge osobe koje su vezane za realizaciju određenih zadataka, ali bez prava odlučivanja.

Predsjednik i potpredsjednik Upravnog odbora je ujedno i predsjednik i potpredsjednik Saveza.

Član 27.

Nadležnosti Upravnog odbora:

- a) priprema sjednice skupštine;
- b) priprema nacrt statuta i drugih akata koje donosi skupština;
- c) provodi politiku, zaključke i druge odluke koje je donijela skupština;
- d) obezbjeđuje provođenje Statuta i drugih opštih akata Saveza i odluka Skupštine;
- e) utvrđuje prijedloge godišnjih i srednjoročnih programa rada i finansijskih planova;
- f) koordinira rad i razvija saradnju sa drugim organizacijama radi uspješnog ostvarivanja rada Saveza;
- g) donosi odluku o isključenju članova iz Saveza u prvom stepenu;
- h) prati provedbu finansijskog plana i donosi odluke o upotrebi sredstava;
- i) priprema izvještaje, analize, informacije i druge materijale za Skupštinu;
- j) donosi poslovnik o svom radu, radu komisija i drugih tijela;
- k) utvrđuje politiku međunarodne sportske saradnje i program međunarodnih takmičenja;
- l) donosi pravilnik Saveza o disciplinskoj i materijalnoj odgovornosti;
- m) odlučuje o organizaciji i načinu obavljanja stručnih i administrativno- tehničkih poslova za potrebe Saveza;
- n) osniva stalna i povremena radna tijela-komisije, odbore, imenuje i razješava njihove predsjednike i članove i potvrđuje im programe rada;
- o) razmatra izvještaje o radu stalnih i povremenih radnih tijela;
- p) bira i razrješava Generalnog sekretara Saveza;
- q) bira i razrješava Direktora reprezentacija;
- r) bira i razrješava Selektore, trenere i drugo stručno osoblje;
- s) utvrđuje programe i planove saveza;
- t) donosi Pravila i propozicije organizovanja i provođenja prvenstvenih takmičenja Saveza;
- u) utvrđuje kalendar i odlučuje o mjestima održavanja državnih streljačkih prvenstava i međunarodnih takmičenja i njihovim organizatorima;
- v) donosi Poslovnik o radu Upravnog odbora Saveza;
- w) daje tumačenja opštih akata Saveza;
- x) organizuje nastupe reprezentacija i utvrđuje kalendar takmičenja;

- y) donosi oduke za službena putovanja u zemlji i inostranstvu za reprezentaciju i vodstvo puta, te priprema i podnosi izvještaj o svom radu;
- z) potvrđuje liste sudaca, delegata, kontrolora koje su predložile nadležne komisije;
- aa) certificira sportske menadžere za streljački sport;
- bb) raspolaže imovinom udruženja;
- cc) podnosi godišnji ili periodični izvještaj o svom radu skupštini na usvajanje; i
- dd) obavlja i i druge poslove određene statutom.

Član 28.

Upravni odbor radi svog operativnijeg i racionalnijeg rada bira svoja radna tijela – komisije i to :

- a) Stručno-takmičarska komisija;
- b) registraciona komisija za registraciju i status igrača;
- c) trenerska komisija,
- d) sudijska komisija.

Upravni odbor može po potrebi osnovati *ad hok* (privremena) radna tijela radi rješavanja posebnih pitanja na određeni vremenski period. On određuje i sastav i definira odgovarajuća prava i dužnosti.

Svako stalno ili privremeno radno tijelo sastoji se od minimalno tri a maksimalno šest članova, uključujući predsjedavajućeg .

Posebnom odlukom Upravni odbor utvrđuje uslove i mandat članova stručnih komisija.

Komisija razmatra pitanja zbog kojih je formirana i daje prijedloge Upravnom odboru.

Član 29.

Upravni odbor i svaki njegov član pojedinačno su odgovorni za svoj rad Skupštini Saveza.

Član 30.

Članovi Upravnog odbora mogu biti opozvani i prije isteka mandata na koje su izabrani i to:

- a) na sopstveni zahtjev;
- b) ako ne prisustvuju sjednicama tri puta uzastopno, bez opravdanih razloga;
- c) ako svojim radnjama u vezi sa radom Upravnog odbora ruše ugled Saveza;

d) u drugim slučajevima predviđenim Zakonom, ovim Statutom i aktima Saveza.

O opozivu člana Upravnog odbora odlučuje Skupština, natpolovičnom većinom glasova prisutnih članova Skupštine.

Član 31.

Predsjednik Upravnog odbora :

- a) saziva sjednice Upravnog odbora samoinicijativno ili na zahtjev najmanje jednog člana Upravnog odbora i rukovodi njenim radom;
- b) stara se o provođenju programa rada, odluka, zaključaka i smjernica Skupštine;
- c) stara se o provođenju plana rada Upravnog odbora;
- d) sačinjava godišnji i polugodišnji izvještaj o svom radu i podnosi ga Upravnom odboru na razmatranje i usvajanje;
- e) potpisuje akte koje donosi Upravni odbor;
- f) održava stalne kontakte sa javnošću i promoviranje ciljeva Saveza;
- g) vrši i druge poslove koje mu odredi Skupština i Upravni odbor Saveza.

Član 32.

Predsjednik i potpredsjednik Saveza

Savez ima predsjednika i potpredsjednika, koje imenuje i razrješava Skupština, na period od četiri godine, s tim da je jedan iz jednog a drugi iz drugog entitetskog Saveza. Nakon isteka mandata se vrši rotacija po entitetskoj osnovi.

Predsjednik i potpredsjednik Saveza su za svoj rad odgovorni Skupštini Saveza.

Predsjednik i potpredsjednik Saveza su ujedno i predsjednik i potpredsjednik Upravnog odbora.

Član 33.

Predsjednik i potpredsjednik Saveza imaju sljedeća prava, dužnosti i odgovornosti:

- a) zastupaju Savez u pravnom prometu;
- b) rukovode radom Savez i organiziraju rad;
- c) odgovorni su za zakonitost rada Saveza;

- d) odlučuju o upotrebi sredstava za realizaciju ciljeva i djelatnosti Saveza;
- e) naredbodavci su u izvršenju finansijskog plana Saveza;
- f) staraju se o izvršenju odluka, zadataka i zaključaka Skupštine;
- g) podnose izvještaj o radu Skupštini;
- h) pripremaju i predlažu nacrt budžeta za rad Saveza Upravnom odboru i Skupštini;
- i) staraju se o pravilnom korištenju imovine Saveza, o urednom obavljanju materijalno finansijskog poslovanja, zakonitom i blagovremenom vršenju stručnih i administrativnih poslova;
- j) koordiniraju rad organa Saveza i donosi odluke o pitanjima rada Saveza, osim onih koji su u isključivoj nadležnosti Skupštine i Upravnog odbora Saveza;
- k) obavljaju druge poslove koje im je povjerila Skupština Saveza.

Član 34.

Predsjednik i potpredsjednik Saveza mogu biti opozvani prije isteka vremena na koji su izabrani i to:

- a) na sopstveni zahtjev;
- b) ako ne obavljaju pravilno poslove predsjednika i potpredsjednika Saveza;
- c) ako svojim radnjama nanose i ruše ugled Saveza;
- d) i drugim slučajevima predviđenim Zakonom, ovim Statutom i aktima Saveza.

Član 35.

Nadzorni odbor

Nadzorni odbor kontrolira finansijsko poslovanje Saveza i o uočenim nepravilnostima bez odlaganja izvještava Skupštinu i Upravni odbor.

Nadzorni odbor dužan je upozoriti na nepravilan rad organa Saveza, na propuste u primjeni odredaba Statuta te na nezakonito i nenamjensko trošenje sredstava Saveza.

Nadzorni odbor dužan je prema potrebi, a najmanje jedanput godišnje, pregledati finansijsko-materijalno poslovanje Saveza. O svom radu Nadzorni odbor izvještava Upravni odbor i Skupštinu Saveza najmanje jedanput godišnje.

Svi organi Saveza dužni su Nadzornom odboru davati podatke, omogućiti mu uvid u dokumentaciju i druge podatke koje zatraži te ga izvijestiti o tome šta su učinili u vezi s njegovim nalazima i prijedlozima.

Član 36.

Članove Nadzornog odbora bira Skupština Saveza.

Nadzorni odbor ima tri člana, predsjednika i dva člana, iz oba entitetska Saveza.

Mandat članovima Nadzornog odbora je četiri godine sa mogućnošću reizbora.

Sjednice Nadzornog odbora održavaju se prema potrebi pod predsjedavanjem predsjednika Nadzornog odbora, a odluke donosi jednoglasno.

Sjednice Nadzornog odbora saziva predsjednik Nadzornog odbora sam ili na zahtjev predsjednika Upravnog odbora Saveza ili pojedinog člana Nadzornog odbora.

Član 37.

Generalni sekretar

Savez ima Generalnog sekretara kojeg imenuje i razrješava Upravni odbor Saveza na period od četiri godine, sa mogućnošću reizbora.

Član 38.

Generalni sekretar vrši sljedeće poslove i zadatke:

- a) priprema odnosno organizuje pripremu normativnih akata i drugih materijala koji se razmatraju na sjednici Skupštine, njenim radnim tijelima, sjednicama Upravnog odbora i drugih organa Saveza;
- b) koordinira rad komisija, selektora, trenera, selekcija o čemu podnosi izvještaj Upravnom odboru;
- c) vodi poslove registracije klubova, sportista, trenera, sportskih menadžera i ostalih članova Saveza;
- d) stara se o arhivi Saveza;
- e) radi i druge poslove po ovlaštenju Upravnog odbora, u skladu sa Statutom.

Član 39.

Disciplinski sud

Savez ima Disciplinski sud koji ima predsjednika i dva člana, koje bira i razrješava Skupština na period od četiri godine sa mogućnošću reizbora, obavezno iz oba entitetska Saveza.

Disciplinski sud odlučuje o sljedećim pitanjima:

- a) kršenju akata, pravila i normi ponašanja Saveza;
- b) disciplinskim prekršajima;
- c) arbitražnim sporovima.

Postupak i način rada Disciplinskog suda utvrdit će se Pravilnikom o radu Disciplinskog suda i drugim opštim aktima Saveza koje donosi Skupština Saveza..

Disciplinski sud zasjeda u punom sastavu i odluke donosi jednoglasno.

VIII. PRAVILA ZA OSTVARIVANJE, UPOTREBU I RASPOLAGANJE SREDSTVIMA SAVEZA, KAO I ORGAN KOJI JE OVLAŠTEN ZA NADZOR NAD UPOTREBOM TIH SREDSTAVA

Član 40.

Prihodi Saveza su prije svega sljedeći:

- a) članarina i kotizacija;
- b) dobrovoljni prilazi i pokloni fizičkih i pravnih lica, kako inozemnih tako i domaćih, u gotovini, uslugama ili imovini bilo koje vrste;
- c) državne subvencije i ugovori sa fizičkim i pravnim licima, kako domaćim tako i inozemnim;
- d) prihodi od kamata, dividendi, dobiti od kapitala, zakupnina, honorara i sličnih izvora pasivnih prihoda;
- e) prihodi stečeni kroz ostvarivanje ciljeva i djelatnosti Saveza u skladu sa Zakonom i ovim Statutom;
- f) sredstva dobivena iz opštinskih, kantonalnih, federalnih i državnih izvora;
- g) drugi izvori u skladu sa Zakonom.

Član 41.

Savez je dužan voditi evidenciju o imovini u skladu sa važećim propisima.

Savez je dužan da propisno vodi poslovne knjige u skladu sa općeprihvaćenim računovodstvenim principima i da sastavlja finansijske izvještaje u skladu sa Zakonom.

Član 42.

Sredstva Saveza mogu se koristiti isključivo za ostvarivanje ciljeva i djelatnosti predviđenih Statutom.

Član 43.

Ostvarivanje, korištenje i raspolaganje sredstvima Saveza utvrđuje se finansijskim planom, kojeg donosi Skupština, na prijedlog Upravnog odbora Saveza.

O upotrebi (korištenju) sredstava, u skladu sa finansijskim planom, odlučuje Upravni odbor.

Član 44.

Nadzor nad upotrebom imovine i sredstava Saveza vrši Nadzorni odbor.

Član 45.

Upravni odbor je dužan, najmanje jednom godišnje, podnijeti Skupštini izvještaj sa podacima o imovini Saveza, prihodima, rashodima i drugim pitanjima od značaja za raspolaganje imovinom i za finansijsko poslovanje Saveza.

Član 46.

Imovinu Saveza čine novčana sredstva, stvari i prava koje Savez stiče u skladu sa Zakonom i ovim Statutom.

Za obaveze prema trećim licima, Savez odgovara cjelokupnom imovinom.

Član 47.

Za obavljanje svih stručnih, administrativnih, knjigovodstvenih i drugih poslova, Upravni odbor nalazi mogućnosti i rješenja koja su u skladu sa Zakonom i principima racionalnog poslovanja. Radi izvršavanja određenih poslova Upravni odbor može angažovati odgovarajuća stručna lica, uz naknadu, a u skladu sa zakonom i mogućnostima Saveza.

IX. PRIZNANJA I NAGRADE

Član 48.

Savez može donositi odluke o dodjeli priznanja i nagrada Saveza.

Priznanja i nagrade može dodjeljivati Skupština, na prijedlog Upravnog odbora.

X. INFORMISANJE I JAVNOST RADA SAVEZA

Član 49.

Rad Saveza je javan.

Članovi Saveza (entitetski savezi) imaju pravo da budu redovno informisani o radu svih organa Saveza.

Za informisanje članova Saveza zadužen je predsjednik Saveza.

Predstavnici sredstava informisanja imaju pravo da prisustvuju sjednicama Skupštine i da izvještavaju o radu tog organa.

Izuzetno, opštim aktom koji donosi Upravni odbor može se utvrditi da pojedine informacije, podaci i isprave, predstavljaju poslovnu tajnu. Istim aktom mogu se utvrditi odgovorna lica za korištenje i zaštitu informacija koje imaju karakter poslovne tajne.

Za poslovnu tajnu ne mogu se odrediti podaci koji su javni po zakonu i drugim propisima, kao i podaci o kršenju zakona i drugih propisa.

XI. ZASTUPANJE SAVEZA

Član 50.

Savez u pravnom prometu s trećim licima zastupa predsjednik i podpredsjednik Saveza.

U postupcima u kojima Savez sudjeluje kao stranka radi ostvarivanja svojih prava, dužnosti i odgovornosti pred nadležnim organima, predsjednik i podpredsjednik Saveza mogu dati pismenu punomoć advokatu za zastupanje ili drugoj stručnoj osobi.

XII. TRAJANJE I PRESTANAK SAVEZA

Član 51.

Savez postoji sve dok za to budu postojali zakonski uslovi ili dok Skupština ne donese odluku o prestanku rada Saveza.

Član 52.

Savez može prestati sa radom dobrovoljno ili po sili zakona.

Odluku o dobrovoljnom prestanku rada Skupština donosi dvotrećinskom većinom članova Skupštine Saveza.

Inicijativu za prestanak rada Saveza može dati jedna trećina članova Skupštine ili Upravni odbor, u slučaju:

- a) ako je proteklo dvostruko više vremena od vremena utvrđenog Statutom Saveza za održavanje Skupštine, a Skupština nije održana,
- b) u drugim slučajevima utvrđenim Zakonom i ovim Statutom.

Inicijativa se podnosi predsjedniku Saveza koji priprema materijal za Skupštinu.

Član 53.

Savez prestaje sa radom po sili zakona, u skladu sa odredbama članova 51. i 52. Zakona.

Savez je obavezan svaku promjenu podataka upisanih u Registar, prijaviti nadležnom Ministarstvu u roku od 30 dana, od dana nastalih promjena.

XIII. SPAJANJE I PODJELA SAVEZA

Član 54.

Savez se može spojiti ili podijeliti u drugo udruženje u skladu sa Zakonom o udruženjima i fondacijama Bosne i Hercegovine.

Odluku iz prethodnog stava donosi Skupština dvotrećinskom većinom članova Skupštine Saveza.

XIV. PRAVILA ZA RASPODJELU PREOSTALE IMOVINE U SLUČAJU PRESTANKA RADA SAVEZA

Član 55.

Istovremeno sa odlukom o prestanku rada Saveza Skupština donosi plan likvidacije Saveza, kojim se utvrđuje raspored imovine, prava i obaveze Saveza.

Skupština imenuje likvidatora Saveza čija dužnost je da se stara o sastavljanju plana likvidacije imovine Saveza, te isti podnosi Skupštini na usvajanje.

Imovina kod raspuštanja Saveza, nakon izmirenja svih zakonskih obaveza, dodijelit će se nekom drugom udruženju koje obavlja iste ili slične djelatnosti, a na osnovu odluke Skupštine.

XV. POSTUPAK ZA DONOŠENJE STATUTA, IZMJENA I DOPUNA STATUTA I DRUGIH OPŠTIH AKATA SAVEZA

Član 56.

Tijela Saveza donose :

- a) osnovne akte,
- b) opće akte,
- c) pojedinačne akte.

Osnovni opšti akt je Statut Saveza.

Opšti akti su: pravilnici, odluke i poslovnici..

Opšti akti moraju biti u saglasnosti sa zakonima i Statutom Saveza.

Pojedinačni akti su: odluke, rješenja, zaključci, uputstva i mišljenja.

Član 57.

Na sastancima organa Saveza i njegovim komisijama - odborima obavezno se sačinjavaju zapisnici.

Zapisnici moraju biti istiniti i moraju sadržavati tok rada sastanka i odluke koje su donijeli organi na svojim sjednicama.

Zapisnici moraju biti potpisani od osobe koja je vodila zapisnik i dva ovjeritelja.

Inicijativu za izmjene i dopune Statuta može podnijeti svaki član Saveza.

Inicijativa se podnosi Upravnom odboru, pismenim putem i sa odgovarajućim obrazloženjem.

Utvrđeni prijedlog dostavlja se Skupštini, najmanje 30 dana prije dana održavanja sjednice Skupštine.

XVI. REPREZENTACIJA

Član 58.

Radi i ostvarivanja najviših dostignuća u streljačkom sportu, Savez uspostavlja nacionalne sportske ekipe (državne reprezentacije) koje mogu imati svoje direktore i selektore.

Savez stvara uslove za rad streljačkih reprezentacija BiH iz stava 1. ovog člana.

Direktor reprezentacija sa nadležnim organima Saveza priprema plan i program rada reprezentativnih selekcija sa stručnjacima koji rade sa pojedinim selekcijama, prati njihove pripreme i rad i preduzima neophodne mjere.

Direktor reprezentacije predlaže Upravnom odboru selektora i trenera reprezentacije, skautira igrače. Direktor predlaže finansiranja reprezentacija u toku jedne godine. Direktor odgovara za pružene rezultate odabranih selekcija i stručnog štaba.

Član 59.

Selektora reprezentacije bira i razriješava dužnosti Upravni odbor, a na prijedlogi Direktora reprezentacije. Mandat selektora traje četiri (4) godine, u principu olimpijski ciklus. Djelokrug rada selektora bliže se uređuje Pravilnikom o radu sa selekcijama.

Selektor predlaže program rada selekcija u toku jedne godine ili olimpijskog ciklusa i podnosi Upravnom odboru na usvajanje.

XVII. DISCIPLINSKI PRAVILNIK

Član 60.

Disciplinske mjere mogu biti izrečene za nedolično ponašanje, nesportsko ponašanje, povredu i prekršaj Statuta Saveza, Pravilnika ili odluka donesenih u skladu sa njima.

Član 61.

Detaljan način podnošenja prijava, izricanja mjera, kao i način podnošenja žalbe biće definisan Pravilnikom o radu Disciplinskog suda, koji donosi Upravni odbor Saveza.

XVIII. EVIDENCIJA I ARHIVA SAVEZA

Član 62.

Upravni odbor obavezan je donijeti Pravilnik o evidenciji i arhivi Saveza.

Član 63.

Evidencija Saveza mora, pored ostalog da sadrži matičnu knjigu u koju se unose podaci o:

- a) spisku članova Saveza;
- b) aktivnim članovima-sportistima u pojedinim selekcijama;
- c) stručnim kadrovima;
- d) donatorima i sponzorima;
- e) profesionalno zaposlenim licima u Savezu;
- f) članovima organa Saveza;
- g) ostvarenim rezultatima na takmičenjima;
- h) drugi podaci.

Član 64.

Evidencija Saveza se vodi na propisanom obrascu koje donosi nadležna komisija koju imenuje Upravni odbor Saveza .

Članovi Saveza su obavezni da vode evidenciju o podacima koje zahtjeva Savez i da ih na njegov zahtjev dostavljaju.

Član 65.

Svaki takmičar-sportista mora se evidentirati u Savezu kako bi mogao učestvovati na takmičenjima koja organizuje Savez.

Evidencija takmičara–sportista i trenera će se vršiti na osnovu Pravilnika o evidenciji i arhivi Saveza.

XIX. PRELAZNE I ZAVRŠNE ODREDBE

Član 66.

Skupština Saveza nadležna je za tumačenje odredbi ovog Statuta.

Član 67.

Ovaj Statut stupa na snagu danom donošenja.

Broj: 02/14

Tuzla, 27.03.2016.

Predsjednik Skupštine

Adolf Ambroš